

La anr en il nov center da meds da massa

■ (anr) **La redacziun centrala da l'Agentura da novitads rumantscha (anr) ha fatg a l'entschatta da l'onn midada da la Via comerciala en la Via da Masans 2 a Cuira.** Ensemen cun l'Agentura telegrafica svizra (ATS/sda) ha la anr pudì s'installar sco emprimas en il nov center da meds da massa da la SRG SSR idée suisse. Durant la primavaira vegnan a s'installar en las novas localitads er il radio e la televisiun rumantscha. L'anr, sut la direcziun da *Guido Jörg*, dat lavur a totalmain duodesch collavuraturas e collavuratur. Ultra da la redacziun centrala a Cuira sa chattan ils auters lieus da lavur a Glion, Mustér, Ardez, Zernez, Cunter, Schmerikon e Berna. L'Agentura da novitads è vegnida fundada dal 1996 ed ha la fina-

mira da sustegnair ils meds da massa rumantschs. Sias prestaziuns èn ina mesura per mantegnair e promover la lingua rumantscha. La anr è ina agentura da novitads independenta dals mediums clients e vegn finanziada cun contribuziuns chantunalas e federalas. Primar-main furnischa ella a las gasettas rumantschas La Quotidiana, La Pagina da Surmeir ed a la Posta Ladina sco er als mediums electronics rumantschs minga di texts e fotografias. Questas contribuziuns vegnan scrittas en tut ils idioms rumantschs sco er en rumantsch grischun. Per regla resguarda l'agentura ils idioms, sch'ella scriva novitads localas u regiunalas; per novitads ch'èn adressadas a tut la Rumantschia vegn duvrà il rumantsch grischun.